

- प्रधानमंत्री नरेन्द्र मोदी कह्यो — वोकल फॉर लोकल रे असलियत बणबा सागे ई भारत दुनिया रो नुवो विनिर्माण केन्द्र बण रह्यो है।
- प्रदेश री सरकारी स्कूलां मांय आज विद्यार्थियां रा मायतां अर शिक्षकां री मीटिंग राख्यी ज्यी—विद्यार्थियां रा विकास ऊं जुड़्या न्यारा—न्यारा मुददां माथे बातचीत करी ज्यी।
- जयपुर मांय राज्य स्तर रो आरोग्य मेळो सरु व्हयो— ईलाज रा आयुर्वेदिक अर देशी तरीकां रे मार्फत लोगां ने स्वस्थ जीवनशैली सारु प्रेरित कर्या जा रहया है।
- रमजान रो मुबारक महीनो आज सरु व्हे रह्यो है—पहलो रोज़ो काल राख्यो जावेला।

000

प्रधानमंत्री नरेन्द्र मोदी आज नई दिल्ली मांय एन एक्स ठी कॉन्कलेव ने सम्बोधित कीना। वे कह्यो के दुनियाभर ऊं लोग भारत ने जाणब सारु अठे आवण री मर्जी राखे है। श्री मोदी कह्यो के हाल ही मांय पूरा व्हया प्रयागराज महाकुंभ मांय करोड़ां लोगां कानी ऊं करी ज्यो पवित्र स्नान दुनिया ने चकित कर दीनो। वे कह्यो के वोकल फॉर लोकल रे अब असलियत बणबा सागे ई भारत विनिर्माण रो नुवो केन्द्र बण रह्यो है।

प्रधानमंत्री कह्यो के ई साल रा केन्द्रीय बजट रो खास मकसद खेती—बाड़ी ने और बेहतर बणावणो है। प्रधानमंत्री आज कृषि और ग्रामीण समृद्धि मुददा माथे राख्यी ज्यी पोस्ट बजट वेबिनार मांय बोल रहया हा। वे कह्यो के खेती—बाड़ी ने विकास रो पहलो इंजन मानता थकां सरकार काश्तकारां ने ऊंची ठौड़ दीनी है। प्रधानमंत्री कह्यो के सरकार केन्द्रीय बजट मांय ‘पीएम धन धान्य कृषि योजना’ चलावण रो ऐलाण कीनो है, ज्यीं रा तैत देश मांय खेती री सब ऊं कम उपज वाढ़ा 100 जिलां रा विकास माथे फोकस कर्यो जावेला।

श्री मोदी प्रधानमंत्री आवास योजना ग्रामीण रो ई जिकर कीनो। वे कह्यो के ई पहल रा तहत गांवाई हलकां मांय जनता ने मकान दिया जा रहया है अर स्वामित्व योजना रे तैत मालिकाना हक रा रिकॉर्ड मुहैया कराया जा रहया है।

000

देशभर मांय आज जन औषधि जन चेतना सप्ताह सरु व्हयो। ओ सात मार्च ताई चालेला। ई मौके केन्द्रीय स्वास्थ्य मंत्री जे.पी. नड्डा आज नई दिल्ली मांय प्रधानमंत्री भारतीय जनऔषधि परियोजना रा रथ अर दस दूजी गाड़ियां ने झांडी बता र रवाना कीनी। ई मौके श्री नड्डा सगळा ऊं ई परियोजना ने जनता रो आंदोलन बणावण री अपील कीनी।

कार्यक्रम मांय स्वास्थ्य अर परिवार कल्याण राज्य मंत्री अनुप्रिया पटेल कह्यो के औषध विभाग रे मार्फत मनाया जा रहया जन औषधि जन चेतना सप्ताह रा तैत न्यारी—न्यारी जागरूकता गतिविधियां चलायी जावेला।

000

मुख्यमंत्री भजनलाल शर्मा आज भरतपुर मांय अहलकारां सागे मीटिंग कर र बजट मांय करी ज्या न्यारा—न्यारा ऐलाण ऊं जुड़्या काम तैय बगत मांय पूरा करण रा हुकम दीना। मुख्यमंत्री लारला बजट मांय करी ज्या ऐलाण ऊं जुड़्या कामां अर जिला मांय चाल रहया विकास रा न्यारा—न्यारा कामां रो ई जायज़ो लीनो। इण ऊं पैली वे गृह राज्य मंत्री जवाहर सिंह बेड़म सागे जन सुणवाई कीनी। मुख्यमंत्री रो काल झूंगरपुर रो दौरो करण रो कार्यक्रम है।

000

राज्य सरकार खान विभाग मांय बाकियात ऊं जुड़्या अदालती मामला बेगा निपटावण सरु कोशिशां तेज़ कर दीनी है। विभाग रा प्रमुख सचिव टी. रविकांत बतायो के अदालतां मांय चाल रहया 10 करोड़ रुप्या ऊं बत्ती रकम री बाकियात रा मामलां मांय सरकार री बात असरदार तरीका ऊं रखी जावेला। वे

बतायो के आं मामलां माथे विचार सारु आला दर्जा री समिति बणायी ज्यी है। रविकांत कह्यो के मोटा तौर ऊं ऐड़ा 50 ऊं बत्ता मामला चाल रहया है।

000

प्रदेश री सरकारी स्कूलां मांय आज विद्यार्थियां रा मायतां अर अध्यापकां री मीटिंग राख्यी ज्यी। इन मांय विद्यार्थियां रा विकास ऊं जुङ्या न्यारा—न्यारा पहलुआं माथे चर्चा करी ज्यी। ईं रा तैत पहली ऊं 8वीं कक्षा तांई रा विद्यार्थियां रा मायतां सागे बातचीत कर र वां ऊं शिक्षा प्रणाली ने और बेहतर बणावण बाबत् ईं विचार मांगी ज्या। ईं मौके शिक्षक विद्यार्थियां री अपार आई.डी बणावण अर वां रा स्वास्थ्य ऊं जुड़ी जाणकारी ईं दीनी।

000

जयपुर मांय जवाहर कला केन्द्र रा शिल्पग्राम मांय आज चार दिन रो आरोग्य मेळो सरु व्हयो। ईं रे मार्फत आयुर्वेद अर ईलाज रा देशी तरीकां ने बधावो देवण री कोशिश करी जा रही है। पेश है एक रपट—

000

राजस्थान केन्द्रीय विश्वविद्यालय रो 8वों दीक्षांत समारोह आज अजमेर ज़िला रा किशनगढ मांय विश्वविद्यालय रा परिसर मांय राख्यी ज्यो। अखिल भारतीय तकनीकी शिक्षा परिषद् रा अध्यक्ष टी.जी. सीतारमन अर नामी वैज्ञानिक डॉ. निलेश देसाई ईं ज़ब्सा मांय सिरकत कीनी। विश्वविद्यालय रा कुलपति प्रोफेसर आनन्द भाले राव बतायो के ज़ब्सा मांय डोढ हज़ार ऊं बत्ता विद्यार्थियां ने उपाधियां दीरीजी। आं मांय 87 पीएचडी स्कॉलर्स ईं शामिल है। ईं मौके न्यारा—न्यारा कोर्स मांय अव्वल रहवण वाला 86 विद्यार्थियां ने सोना रा तमगा दे र नवाजी ज्या।

000

साल 2021 री एस.आई. भर्ती परीक्षा मांय गड़बड़ी करण रा मामलां मांय दोषी मिल्या श्रीगंगानगर मांय पोस्टिंग वाला चार सब इन्सपेक्टरां ने पुलिस री सेवा ऊं निकाल दिया ज्या है। पुलिस महानिरीक्षक ओमप्रकाश पासवान बतायो के आं माथे भर्ती परीक्षा मांय गड़बड़ी करण रो आरोप है अर सरुआती जांच मांय अ सगळा दोषी मिल्या है, ज्यां ने सेवा नियमां रा तहत बर्खास्त कर दिया ज्या है।

000

रमज़ान रो पाक महीनो आज सरु व्हे रहयो है। आज चांद रात है। आज रात ऊं मस्जिदां मांय खास नवाज़ रो सिलसिलो ईं सरु व्हे जावेला। काल पहलो रोजो राख्यो जावेला। इस्लाम मांय ईं मुबारक महीना रो घणो महत्त्व है। माह—ए—रमज़ान मांय मुस्लिम अकीदतमंद रोज़ा राखे है अर इबादत करे है। रमज़ान री तैयारियां ज़ोरां ऊं चाल रही है अर लोग सहरी अर इफ़तार सारु सामग्री री खरीददारी कर रह्या है। ईं महीना रे खत्म व्हेवण परां ईद—उल—फितर मनायी जावेला।

000

झालावाड़ ज़िला मांय अश्व गंधा री खेती करण सारु किसानां रो रुझान बध रह्यो है। अश्व गंधा केर्झ भांत री दवाइयां बणावण रे काम आवे है। म्हाणा खबरनवीस बतायो के ओ पौधो किण ईं भांत री मिट्टी मांय ऊग जावे है।

000

जयपुर मांय 3 ऊं 5 मार्च तांई व्हेवण वाला एशिया—प्रशांत हलका रा थ्री आर अर सर्कुलर इकोनॉमी फोरम मांय 30 ऊं बत्ता देशां रा नुमाइन्दा सिरकत करेला। फोरम मांय उद्योग जगत रा जाणकार, शोध करण वाला अर सिविल सोसाएटी रा नुमाइन्दा सिरकत करेला। आवास अर शहरी कार्य मंत्रालय री अगुवाई मांय राख्या जा रह्या ईं फोरम मांय जापान रा पर्यावरण मंत्रालय अर संयुक्त राष्ट्र संघ री ओर ऊं ईं मदद दी जा रही है। ईं दौरान इण्डिया पेवेलियन मांय न्यारा—न्यारा मंत्रालयां अर राष्ट्रीय मिशनां री प्रदर्शनी सागे केर्झ सत्र राख्या जावेला।

000